

Entrevista exclusivo cu autor di e
'Cancion di Amor' Jeffrey Kelly for di Hulanda....

"DANKI NA DIOS CU MI DESEO A BIRA UN REALIDAD!..."

**** Durante siman DEN AMBIENTE a ricibi un grato yamada di e mayorman di e tremendo cantante romantico, Jeffrey Kelly, autor di e fantastico cancion romantico, "CANCION DI AMOR", cual cancion ta causando un furor fuer-tisimo ariba nos radio-emisoranan.**

Pa sorpresa di DEN AMBIENTE, e tata di Jeffrey Kelly a resulta di ta e conocido musico y promotor di festivalnan di mariachi, esta Pablo Kelly, kende a caba di bolbe for di Guadalajara, Mexico, despues di un super exitoso gira hunto cu Mariachi Lirios Del Campo.

Tabata masha dia cu DEN AMBIENTE kier a drenta den contacto cu e tremendo cantante aki y tabata manera DIOS a tende e deseo di DEN AMBIENTE, pasobra den un frega di wowo, e mayorman mes a tuma contacto cu DEN AMBIENTE.

Gracias na e mayorman aki, cu DEN AMBIENTE a regaliza e entrevista exclusivo aki cu Jeffrey Kelly, cual a tuma lugar na nan propio cas, na momento cu nan querido yiu homber a yama for di Hulanda. Pa awe merdia tambe durante e programa farandulero di DEN AMBIENTE na Radio Galactica, lo tin un entrevista envivo for di Tilburg, Hulanda, cu Jeffrey Kelly.

Durante e entrevista aki, DEN AMBIENTE por a compronde cu e cancion aki a wordo graba durante e oranan di marduga, net ariba e dia cu e mester a viaha pa Hulanda.

Jeffrey Kelly mes nunca por a pensa cu e cancion di amor aki, lo a bay resulta den un exito asina grandi. E cancion di amor aki a ser compone pa e propio Jeffrey Kelly y



aregla pa e talentoso arreglista y ingeniero di studio, Hubert Thiel.

Jeffrey Kelly ta relata con el a bin na inspira e bunita "Cancion di Amor". "E cancion a wordo skirbi ariba un anochi cu mi a yega for di school". E cantante ta sigui amplia, "Mi a yega cas y a pasa man cu mi guitarra, mi tabata toca un tiki y a bin den mi mente pa traha un cancion pa un persona hopi especial". "Bon den menos di 20 minuut mi tabatin e tex di tur e palabranan hinca den otro, cual mi a haya masha bunita mes, pa cual mi tabata desea na e momento ey mes pa un dia mi graba, y danki na DIOS cu mi deseo a bira un realidad".

E popular cantante romantico ta conta tambe di su experiencia na momento cu e mester a graba e cancion aki den un tempo record, ya cu den apenas algun ora despues, e mester ta na aeropuerto pa asina e viaha pa Hulanda.

"Bon debi cu ta un dia prome cu mi a bin Hulanda, e tempo tabata relativamente corto y tur cos mester a bay hopi liber, pero den menos di dos ora y mei nos a hinca e cancion den otro y bueno e tabata un experiencia completamente nobo pa mi, ya cu ta pa prome biaha cu mi a drenta den studio pa graba un cancion, pero el a bay tremendamente bon, cual mi mester

bisa cu esaki ta danki na e fabuloso cooperacion di Hubert Thiel".

Tambe Jeffrey Kelly a expresa su palabranan di gratitud pa su otro amigonan cu a yude masha hopi mes, kendenan ta; Sigmund Jandroep, Elton Lampe y Alan Werleman.

Sin e tremendo colaboracion di su amigonan aki hunto cu Hubert Thiel, nunca e cancion di amor aki por ta un "CANCION DI AMOR" aworaki, Jeffrey Kelly ta enfatiza.

Na Hulanda, Jeffrey Kelly ta studiando na Maller Instituut Tilburg pa ser un maestro di e idioma ingles, cual estudio lo dura cuater aña pa e termina.

Segun DEN AMBIENTE por a compronde for di joven cantante estudiante aki, cu e estudio aki ta uno sumamente pisa, cual estudio no ta permiti tempo pa e ni sikiera tuma contacto cu e demas musiconan na Hulanda, pa di e forma ey tambe promove su exitoso cancion di amor na Hulanda.

Pero tog Jeffrey a declara cu e tin dos cancion mas pa graba y e ta waak un manera for di otro pa graba esakinan. Tocante su estudio di idioma ingles, Jeffrey Kelly a declara cu no solamente e estudio aki lo bay sirbi pa e ta un maestro di idioma ingles, pero tambe lo bay sirbi engrandi pa e por compone y graba cancionnan romantico na idioma ingles, pa asina e purba su suerte tambe pa logra penetra ariba e mercado internacional.

Na final di e entrevista telefonico aki, Jeffrey Kelly kier a gradici henter su dushi pueblo di Aruba, pa e aceptacion y apoyo masal cu a hasi su CANCION DI AMOR, bira un super CANCION DI AMOR...

Entrevista cu Long Roy....

LONG ROY DEN UN CONCIERTO GRANDI NA SANTA MARTHA COLOMBIA....



**** Diahuebs ultimo a sali pa Santa Martha, Colombia, e popular cantante/baterista, LONG ROY, kende awe diasabra anochi lo ta den un concierto grandi na Santa Martha, Colombia.**

Prome cu Long Roy a sali pa Santa Martha, Colombia, DEN AMBIENTE a realiza un entrevista exclusivo cu e fenomenal artista local na aeropuerto.

Long Roy a declara cu na Santa Martha e lo presenta den un concierto grandi, na unda e atraccion principal lo ta e popular cantante Joe Aroyo. Tambe lo presenta cuater grupo musical di Colombia y un grupo musical di Cuba.

E concierto aki cual lo ser dedica na e juventud di Santa Martha, lo ser realiza den un di e stadion mas grandi di e ciudad di e popular cantante y actor Carlos Vives. E stadion aki tin un capacidad di mas cu 30 mil persona.

E invitacion pa Long Roy presenta, ta debi na e hecho cu su cancionnan ariba su recien disco compacto "Longer Than Ever", ta mal pega na Santa Martha, Colombia. Muy especial e cancionnan; "Mueve los pies", "Dame Mas", "Muje Muje" y "Carnaval para Gozar", ta esnan cu ta zona pisa na e radio-emisoranan. Segun por a compronde cu e pieza "Dame Mas" ta esun mas gusta y tambe "Muje Muje" actualmente ta birando un hit grandi.

E cancionnan aki ta

causando un exito asina grandi, cu Long Roy a ser solicita pa hiba un lote di 1500 C.D., cual e lo distribui tanto na Santa Martha como tambe na e demas ciudadnan na Colombia.

Pa loko ta trata di Long Roy su presentacion dilanti un multitud di alrededor 30 mil persona, e popular cantante local lo ser acompaña pa un orquesta di Cartagena cu yama "Escety". Long Roy a declara cu ya caba nan tin tur su piezanan programa. Ayera Long Roy mester a ensaya hunto cu e orquesta, den cual e lo bay presenta ocho pieza, cualnan ta; "Muje Muje", "Dame Mas", "Mueve los pies", "Carnaval para Gozar", "Wild Flower", un cancion di Bob Marley "No woman no cry", e hit grandi di Arow "Hot Hot" y tambe si e publico ta desea pa un repitalo, e ta dispuesto pa presenta un mas.

Pa otro siman DEN AMBIENTE lo publica e segundo parti di e entrevista aki, na unda Long Roy ta declara su siguiente proyectonan internacional den futuro cercano, cualnan ta hopi interesante. Tambe naturalmente nos lo entrevista Long Roy, tocante su presentacion na Santa Martha, Colombia.

Pero mientrastanto awemerdia waak pa bo ta claba durante e programa di DEN AMBIENTE na Radio Galactica, pasobra Long Roy a priminti un yamada for di Santa Martha, pa un entrevista envivo, pues keda pendiente....